

मार्निंग डोगरी न्यूज़ बुलेटिन,

समा. 09.20 Hrs

<><><><><><><><><><><><>

Headlines

1. जम्मू-कश्मीर कैबिनेट दी अज्ज बैठक लग्गा करदी ऐ, विधानसभा इजलास बलाने पर सिफारश दी संभावना।
2. भारत-आस्ट्रेलिया प्रतिनिधिमंडलै मुखमंत्री उमर अब्दुल्ला हुंदे कन्नै मलाटी लाई, जम्मू-कश्मीर लेई परिवर्तनकारी CSR पहल दा प्रस्ताव रक्खेया।
3. जम्मू-कश्मीर च विकास प्राथमिकताएं पर चर्चा लेई नेकें विधायकें मुखमंत्री हुंदे कन्नै मलाटी लाई।
4. कृषि मंत्री जावेद डार होरें डेरी ते पशुपालन क्षेत्र गी तगड़ा करने दे मकसद कन्नै केन्द्री मंत्री हुंदे कन्नै वर्चुअल बैठक च हिस्सा लैता।
5. सार्वजनिक साब-लेखे सरबन्धी कमेटी नै सरकारी स्कूलें च म्यारी शिक्षा पर जोर भरेया, दूर-दराज ईलाकें च तैनात कर्मचारियें लेई Hardship Allowance दी मंग कीती।

<><><><><><>

Cabinet Meet

जम्मू-कश्मीर कैबिनेट दी अज्ज इक बैठक लग्गने जा रदी ऐ जेहदे च केई प्रस्तावें पर मुकदा फैसला लैता जाहग, जिन्दे च असैम्बली दा अगला इजलास सद्दने बारे उपराज्यपाल हुंदे अग्गे

सफारश करने दा प्रस्ताव बी शामिल ऐ। आकाशवाणी दे जम्मू संवाददाता नै जानकारी दिती ऐ जे मुखमंत्रि उमर अब्दुल्ला हुंदी अध्यक्षता च मंत्रीमंडल दी बैठक अज्ज लग्गने दी मेद ऐ, जेहदे च एल.जी होरें गी असैम्बली दा ऑटम सेशन सददने बारे प्रस्ताव रखेया जाग। असैम्बली दा इजलास अक्टूबर महीने दे त्रीए जा चौथै हफ्तै सददने दी सिफारश कीती जाहग ते मेद ऐ जे एह इजलास 20 कोला 27 अक्टूबर दे मझाटै शुरु होई सकदा ऐ। जम्मू-कश्मीर पुर्नगठन कनून 2019 मुजब विधानसभा दे दंऊ इजलासैं बश्कार 6 महीने कोला मता वक्फा नेही होना लोड़चदा। यानि पिच्छले इजलास दी खीरी बैठक ते अगले इजलास दी पैहली बैठक बश्कार एह वक्फा 6 महीने कोला घट्ट होना लोड़चदा।

<><><><><><>

CM- Delegation

मुखमंत्रि उमर अब्दुल्ला होरें भारत CSR नेटवर्क ते सर्कुलर इकोनॉमी अलायंस आस्ट्रेलिया दे प्रधान ते संस्थापक साजिद सैयद हुंदी नुमायंदगी च कल भारत -आस्ट्रेलियाई प्रतीनिधिमंडल कन्नै मलाटी लाई। मलाटी दौरान जम्मू-कश्मीर च सतत विकास गी बढ़ावा देने दे मकसद कन्नै कार्पोरेट सामाजिक जिम्मेदारियें कन्नै सरबंधत परियोजनाएं दी इक्क लड़ी पर गल्ल-कत्थ कीती गेई। प्रतिनिधिमंडलै सामुदायिक सशक्तिकरण ते पर्यावरणीय स्थिरता गी बढ़ावा देने तांई नेकें पहलकदमियें दा प्रस्ताव रखेया, जिंदे च स्मार्ट ग्राएं दी स्थापना- AI लैबें गी खडेरना, कूड़े-कचरे थमां रुपे-पैहा कमाने सरबंधी कार्यक्रमें गी लागू करना, जल-उपचार परियोजना रम्भ करना ते हाड़ें कन्नै प्रभावत लोकें गी पुर्नवास मदाद उपलब्ध करोआना शामिल ऐ। प्रस्तावें दा

सोआगत करदे होई मुखमंत्री होरें समावेशी विकास बक्खी प्रतिनिधिमंडलें दी सराहना कीती ते सहयोग तांई प्राथमिकता आहले क्षेत्रें दी निशानदेई कीती।

<><><><><><>

CM Legislator

मुखमंत्री उमर अब्दुल्ला होरें कल विधानसभा दे बक्ख-बक्ख मिम्बरें कन्नै मलाटी लाइयै उन्दे निर्वाचन हलके च जन-कल्याण ते विकास कन्नै जुड़े दे मुख मुद्दें पर चर्चा कीती। कंगन थमां मेहर अली, जादीबल थमां तनवीर सादिक, शौकत हुसैन गनई जैनपोरा थमां, इंजीनियर खुर्शीद अहदम गूल, गुरेज थमां विधायक नज़ीर अहमद खान, पुंछ दे एजाज अहमद जान होरें मुखमंत्री हुंदे कन्नै बक्ख-बक्ख मलाटी लाइयै अपने निर्वाचन हलके कन्नै सरबंघत विकास लेई लोडचदियें स्कीमें लेई लोडचदियें स्कीमें चीजें-बस्तें परियोजनां पर लौ पाई। मुखमंत्री होरें आए दे विधायकें गी भरोसा दोआया जे सरकार सार्वजनिक महत्व आहले मामलें गी सब्भनै शा पैहल दिन्दी ऐ ते प्रदेश च सामे विकास ते कल्याण गी यकीनी बनाने लेई वचनबद्ध ऐ।

<><><><><><>

Seva Parv Informal Sec

मुख भरै च चलै करदी “सेवा पर्व” आहली पैहल तैहत अज्ज अस्स गल्ल करने आं मोदी सरकार दे कल्याणकारी उपाएं, समाजी सुरक्षा ते माली समावेशन आहलियें पैहलकदमियें दी जिन्दे राएं अनोपचारिक क्षेत्र गी निगगर बनाने दे जतन कीते गेन। इस सरबंघै च पिछले बरे पी.एम. स्वनिधि दे लाभार्थियें गी सम्बोधित करदे होई प्रधानमंत्री मोदी होरें आक्खेया हा.

असैंगी पता होना लोड़चदा जे देसै दे सकल घरेलू उत्पाद यानि GDP च अनोपचारिक क्षेत्र दा जोगदान लगभग 45 प्रतिशत ऐ जिसे अनदिक्खा नेही कीता जाई सकदा ते इससै गल्लै गी ध्यानै च रखदे होई इस क्षेत्र दे सशक्तिकरण बक्खी चेचा ध्यान दिता जा रदा ऐ। सरकारै असंगठिगत क्षेत्र च कम्म करने आहलें गी सशक्त बनाने दी जिम्मेवारी अपने सिर लैती। रेहड़ी-फड़ी आहलें लेई “पी.एम. स्ट्रीट वैंडर्स आत्मनिर्भर निधि स्कीम” तैहत दिते जाने आहले फैयदें च डिजिटल तरीके कन्नै अदायगी करने आहलें गी कैश-बैंक दी सुविधा बी दिती जन्दी ऐ। रेहहड़ी लाने आहले इक आदमी दा इस स्कीम बारे आखना ऐ जे एहदे नै ओहदे कम्मै गी बधाने च बड़ी सहूलत होई ऐ.

<><><><><><>

Prog. Announcement

आकाशवाणी दा क्षेत्रीय समाचार एकांश जम्मू “सेवा पर्व 2025” दे सिलसिले च आत्मनिर्भर भारत विषय पर 30एं मिन्टे दी इक विशेष परिचर्चा प्रसारित करने जा रदा ऐ। कल बुधवारें 24 सितम्बर गी प्रसारत होने आहली इस परिचर्चा च स्हाड़े परौहने होगंन उद्योग ते बपार मैहकमे दे निदेशक अरुण मन्हास जेहड़े इस विषय पर तफसीली जानकारी देने दे कन्नो-कन्नी एहदे बक्ख-बक्ख पैहलुएं पर चर्चा बी करगंन। इंदे कन्नै गल्लबात करगंन स्हाड़ियां न्यूज एंकर श्रुति खजूरिया ते अभिलाषा शर्मा। चेता रक्खयो कल, बुधवारे 24 सितम्बर दिने साइडे 12 बजे, स्हाड़े इससै चैनल पर मीडियम वेव 303 मीटर यानी 990 किलोहर्टस ते एफ.एम. 100 इशारिया 3 मैगाहर्टस पर।

<><><><><><>

Dar Virtual Meeting

राई-बाई उत्पादन मैहकमे दे मंत्री जावेद अहमद डार होरें केन्द्री मच्छी, पशुपालन ते डेयरी मंत्री राजीव रंजन सिंह हुंदी प्रधानता च लग्गी दी इक्क वर्चुअल बैठक च हिस्सा लैता। ए बैठक डेरी ते पशुपालन क्षेत्र गी तगड़ा करने ताई सब्भै राज्यें ते केन्द्र शासित प्रदेशें थमां सुझा किट्ठा करने दे मकसद कन्नै आयोजित कीती गेदी ही, तां जे करसानें दी भलाई-बेहतरी बक्खी ध्यान दिंदे होई पशुधन ते अर्थ-बवस्था गी बढ़ावा दिता जाई सकै।

<><><><><><>

PAC Meeting

जम्मू-कश्मीर विधानसभा दी सार्वजनिक साब-लेखें सरबंधी कमेटी PAC नै स्कूली शिक्षा मैहकमे कन्नै सरबंधत आडिट पैरें दी समीक्षा आस्तै श्रीनगर विधानसभा परिसर च इक्क बैठक लाई। बैठक दी प्रधानता PAC अध्यक्ष शाम लाल शर्मा होरें कीती जेदे च कमेटी दे मिम्बर शामिल होए। कमेटी नै जम्मू-कश्मीर च पूरे-पराते सुधार लेई सरकारी स्कूलें च पढ़ा करदे विद्यार्थियें तगगर म्यारी शिक्षा पुजाने पर जोर भरेया। एदे इलावा दूर-दराज ईलाकें च तैनात कर्मचारियें दी सहूलत लेई उनेंगी Hardship Allowance देने पर बी जोर पाया गया।

<><><><><><>

GST Reforms

अगली पीढ़ी दे वस्तु ते सेवा कर GST लागू होई गेन। कपड़ा उद्योग गी राहत देने आस्तै सरकारें उद्यमियें आस्सेया बनाए जाने आहले रेशें पर GST 18 प्रतिशत थमां घटाइयै 5

प्रतिशत करी दिता ऐ, कन्नै गै इस्सै चाली दे धागें पर टैक्स दी दर 12 थमां घटाइयै 5 प्रतिशत करी दिती गेई ऐ। घरेलू खडोना उद्योग गी बढ़ावा देने ताई खडौने ते खेड्डें दे समेयान पर बी GST 12 फीसदी थमां घटाइयै 5 फीसद कीती गेई ऐ। इन्हें सुधारें दी सराहना करदे होई इक्क मकामी जनें नै गलाया.

<><><><><><>

GOC Visit

वाईट नाईट कोर दे GOC लैफ्टिनेंट जनरल पी.के. मिश्रा होरें आतंकवादियें कन्नै लग्गे दे हालिया टाकरे परैन्त उधमपुर-डोडा ते किश्तवाड़ जिले दे पहाड़ी ईलाकें च चला करदे आतंकवाद विरोधी अभियानें दी समीक्षा कीती। आकाशवाणी दे जम्मू संवाददाता नै दस्सेया जे आतंकवादियें कन्नै भखे दे इक्क हालिया टाकरे च इक जवान दे शहीद होने मगरा शुक्रवार संजा थमां गै उधमपुर जिले दे डुडू -बसंतगढ़ गी डोडा जिले दे भद्रवाह कन्नै जोड़ने आहले सियोज धार जंगल च व्यापक तपाशी अभियान चलाया जा करदा ऐ। तारे दपैहरी थोड़ी देर भखे दे टाकरे मगरा किश्तवाड़ जिले दे केशवान जंगल च इक्क और अभियान रम्भ कीता गया। आतंकवाद विरोधी बल डेल्टा दे GOC मेजर जनरल APS बल हुंदे कन्नै कोर कमांडर बी चला करदे अभिजानें दी समीक्षा ताई सियोज धार पुज्जे।

<><><><><><>